



清刻龍藏佛說法變相圖

中阿含經卷第四十一

名一

東晉劉賓三藏瞿曇僧伽提婆譯

梵志品梵摩經第二十

我聞如是一時佛遊鞞陀提國與大比丘眾  
 俱爾時彌薩羅有梵志名曰梵摩極大富樂  
 資財無量畜牧產業不可稱計封戶食邑種  
 種具足豐饒彌薩羅乃至水草木謂摩竭陀  
 王未生怨鞞陀提子特與梵封梵志梵摩有  
 一摩納名優多羅為父母所舉受生清淨乃  
 至七世父母不絕種族生生無惡博聞總持  
 誦過四典經深達因緣正文戲五句說梵志  
 梵摩聞有沙門瞿曇釋種子捨釋宗族剃除  
 鬚髮著袈裟衣至信捨家無家學道遊鞞陀  
 提國與大比丘眾俱彼沙門瞿曇有大名稱  
 周聞十方彼沙門瞿曇如來無所著等正覺

明行成爲善逝世間解無上士道法御天人  
師號佛衆祐彼於此世天及魔梵沙門梵志  
從人至天自知自覺自作證成就遊彼說法  
初妙中妙竟亦妙有義有文具足清淨顯現  
梵行復次聞彼沙門瞿曇成就三十二大人  
之相若成就大人相者必有二處真諦不虛  
若在家者必爲轉輪王聰明智慧有四種軍  
整御天下由已自在如法法王成就七寶彼  
七寶者輪寶象寶馬寶珠寶寶女寶居士寶主  
兵臣寶是謂爲七千子具足顏貌端正勇猛  
無畏能伏他衆彼必統領此一切地乃至大  
海不以刀杖以法教令令得安隱若剃除鬚  
髮著袈裟衣至信捨家無家學道者必得如  
來無所著等正覺名稱流布周聞十方梵志  
梵摩聞已告曰優多羅我聞如是彼沙門瞿

曇釋種子捨釋宗族剃除鬚髮著袈裟衣至  
信捨家無家學道遊鞞陀提國與大比丘衆  
俱優多羅彼沙門瞿曇有六名稱周聞十方  
彼沙門瞿曇如來無所著等正覺明行成爲  
善逝世間解無上士道法御天人師號佛衆  
祐彼於此世天及魔梵沙門梵志從人至天  
自知自覺自作證成就遊彼說法初妙中妙  
竟亦妙有義有文具足清淨顯現梵行復次  
優多羅彼沙門瞿曇成就三十二大人之相  
若成就大人相者必有二處真諦不虛若  
在家者必爲轉輪王聰明智慧有四種軍整御  
天下由已自在如法法王成就七寶彼七寶  
者輪寶象寶馬寶珠寶寶女寶居士寶主兵臣  
寶是謂爲七千子具足顏貌端正勇猛無畏  
能伏他衆彼必統領此一切地乃至大海不

以刀杖以法教令令得安隱若剃除鬚髮著袈裟衣至信捨家無家學道者必得如來無所著等正覺名稱流布周聞十方優多羅汝受持諸經有三十二大人之相若成就大人相者必有二處真諦不虛若在家者必為轉輪王聰明智慧有四種軍整御天下由已自在如法法王成就七寶彼七寶者輪寶象寶馬寶珠寶女寶居士寶主兵臣寶是謂為七千子具足顏貌端正勇猛無畏能伏他衆彼必統領此一切地乃至大海不以刀杖以法教令令得安隱若剃除鬚髮著袈裟衣至信捨家無家學道者必得如來無所著等正覺名稱流布周聞十方優多羅答曰唯然尊我受持諸經有三十二大人之相若成就大人相者必有二處真諦不虛若在家者必為轉

輪王聰明智慧有四種軍整御天下由已自在如法法王成就七寶彼七寶者輪寶象寶馬寶珠寶女寶居士寶主兵臣寶是謂為七千子具足顏貌端正勇猛無畏能伏他衆彼必統領此一切地乃至大海不以刀杖以法教令令得安隱若剃除鬚髮著袈裟衣至信捨家無家學道者必得如來無所著等正覺名稱流布周聞十方梵志梵摩告曰優多羅汝往詣彼沙門瞿曇所觀彼沙門瞿曇為如是為不如是實有三十二大人之相耶優多羅摩納聞已稽首梵志梵摩足繞三匝而去往詣佛所共相問訊却坐一面觀世尊身三十二相彼見世尊身有三十相於二相疑惑陰馬藏及廣長舌世尊念曰此優多羅於我身觀三十二相彼見有三十相於二相疑惑

陰馬藏及廣長舌我今寧可斷其疑惑世尊  
知已即如其像作如意足如其像作如意足  
已令優多羅摩納見我身陰馬藏及廣長舌  
於是世尊即如其像作如意足如其像作如  
意足已優多羅摩納見世尊身陰為藏及廣  
長舌廣長舌者從口出舌盡覆其面優多羅  
摩納見已而作是念沙門瞿曇成就三十二  
大人之相若成就大人相者必有二處真諦  
不虛若在家者必為轉輪王聰明智慧有四  
種軍整御天下由已自在如法法王成就七  
寶各一彼七寶者輪寶象寶馬寶珠寶女寶居士  
寶主兵臣寶是謂為七千子具足顏貌端正  
勇猛無畏能伏他衆彼必統領此一切地乃  
至大海不以刀杖以法教令得安隱若剃  
除鬚髮著袈裟衣至信捨家無家學道者必

得如來無所著等正覺名稱流布周聞十方  
優多羅摩納復作是念我寧可極觀威儀禮  
節及觀遊行所趣於是優多羅摩納尋隨佛  
行於夏四月觀威儀禮節及觀遊行所趣優  
多羅摩納過夏四月悅可世尊威儀禮節及  
觀遊行所趣白曰瞿曇我今有事欲還請辭  
世尊告曰優多羅汝去隨意優多羅摩納聞  
世尊所說善受善持即從座起繞三匝而去  
往詣梵志梵摩所稽首梵志梵摩足却坐一  
面梵志梵摩問曰優多羅實如所聞沙門瞿  
曇有大名稱周聞十方為如是為不如是實  
有三十二大人相耶優多羅摩納答曰唯然  
尊實如所聞沙門瞿曇有大名稱周聞十方  
沙門瞿曇如是非不如是實有三十二相尊  
沙門瞿曇足安平立是謂尊沙門瞿曇大人  
各一

大人之相復次尊沙門瞿曇足下生輪輪有千輻一切具足是謂尊沙門瞿曇大人大人之相復次尊沙門瞿曇足指纖長是謂尊沙門瞿曇大人大人之相復次尊沙門瞿曇足周正直是謂尊沙門瞿曇大人大人之相復次尊沙門瞿曇足跟踝後兩邊平滿是謂尊沙門瞿曇大人大人之相復次尊沙門瞿曇足兩踝臄是謂尊沙門瞿曇大人大人之相復次尊沙門瞿曇身毛上向是謂尊沙門瞿曇大人大人之相復次尊沙門瞿曇手足網縵猶如鵝王是謂尊沙門瞿曇大人大人之相復次尊沙門瞿曇手足極妙柔弱濡軟猶兜羅華是謂尊沙門瞿曇大人大人之相復次尊沙門瞿曇肌皮濡細塵水不著是謂尊沙門瞿曇大人大人之相復次尊沙門瞿曇

一一毛一一毛者身一一孔一毛生色若紺青如螺右旋是謂尊沙門瞿曇大人大人之相復次尊沙門瞿曇鹿膈腸猶如鹿王是謂尊沙門瞿曇大人大人之相復次尊沙門瞿曇陰馬藏猶如良馬王是謂尊沙門瞿曇大人大人之相復次尊沙門瞿曇身形圓好猶尼拘類樹上下圓相稱是謂尊沙門瞿曇大人大人之相復次尊沙門瞿曇身不阿曲身不曲者平立伸手以摩其膝是謂尊沙門瞿曇大人大人之相復次尊沙門瞿曇身黃金色如紫磨金是謂尊沙門瞿曇大人大人之相復次尊沙門瞿曇身七處滿七處滿者兩手兩足兩肩及頸是謂尊沙門瞿曇大人大人之相復次尊沙門瞿曇其身上身大猶如師子

是謂尊沙門瞿曇大人大人之相復次尊沙

阿瞿曇師子頰車是謂尊沙門瞿曇大人大人之相復次尊沙門瞿曇脊背平直是謂尊沙門瞿曇大人大人之相復次尊沙門瞿曇兩肩上連通頸平滿是謂尊沙門瞿曇大人大人之相復次尊沙門瞿曇四十齒平齒不踈齒白齒通味第一味是謂尊沙門瞿曇大人大人之相復次尊沙門瞿曇梵音可愛其聲猶如加羅毗伽是謂尊沙門瞿曇大人大人之相復次尊沙門瞿曇廣長舌廣長舌者舌從口出遍覆其面是謂尊沙門瞿曇大人大人之相復次尊沙門瞿曇承淚處滿猶如牛王是謂尊沙門瞿曇大人大人之相復次尊沙門瞿曇眼色紺青是謂尊沙門瞿曇大人大人之相復次尊沙門瞿曇頂有肉髻團圓相稱髮螺右旋是謂尊沙門瞿曇大人大人

人之相復次尊沙門瞿曇眉間生毛潔白右縈是謂尊沙門瞿曇大人大人之相是謂尊沙門瞿曇成就三十二大人之相若成就大人相者必有二處真諦不虛若在家者必為轉輪王聰明智慧有四種軍整御天下由已自在如法法王成就七寶彼七寶者輪寶象寶馬寶珠寶女寶居士寶主兵臣寶是謂為七千子具足顏貌端正勇猛無畏能伏他眾彼必統領此一切地乃至大海不以刀杖以法教令令得安隱若剃除鬚髮著袈裟衣至信捨家無家學道者必得如來無所著等正覺名稱流布周聞十方復次尊我見沙門瞿曇著衣已著衣被衣已被衣出房已出房出園已出園行道至村間入村已入村在巷入家已入家正牀已正牀坐已坐澡手已澡手

受飲食已受飲食食已食澡手呪願從座起  
出家已出家在巷出村已出村入園已入園  
入房已入房尊沙門瞿曇著衣齊整不高不  
下衣不近體風不能令衣遠離身尊沙門瞿  
曇被衣齊整不高不下衣不近體風不能令  
衣遠離身尊沙門瞿曇常著新衣隨順於聖  
以刀割截染作惡色如是彼聖染作惡色彼  
持衣者不為財物不為貢高不為自飾不為  
莊嚴但為鄣蔽蚊蝱風日之所觸故及為慙  
愧覆其身故彼出房時身不低仰尊沙門瞿  
曇出房時終不低身尊沙門瞿曇若欲行時  
先舉右足正舉正下行不擾亂亦無惡亂行  
時兩踝終不相振尊沙門瞿曇行時不為塵  
土所盆所以者何以本善行故彼出園時身  
不低仰尊沙門瞿曇出園時終不低身往到

村間身極右旋觀察如龍遍觀而觀不恐不  
怖亦不驚懼觀於諸方所以者何以如來無  
所著等正覺故彼入村時身不低仰尊沙門  
瞿曇入村時終不低身彼在街巷不低視亦  
不仰視唯直正視於中不礙所知所見尊沙  
門瞿曇諸根常定所以者何以本善行故彼  
入家時身不低仰尊沙門瞿曇入家時終不  
低身尊沙門瞿曇迴身右旋正牀而坐彼於  
牀上不極身力坐亦不以手案膝坐牀彼坐  
牀已不悒悒不煩惱亦復不樂受澡水時不  
高不下不多不少彼受飲食不高不下不多  
不少尊沙門瞿曇受食平鉢等羹飯食尊沙  
門瞿曇搏食齊整徐著口中搏食未至不預  
張口及在口中三嚼而咽無飯及羹亦不斷  
碎有餘在口復內後搏尊沙門瞿曇以三事

清淨食欲得味不欲染味彼食不為財物不為貢高不為自飾不為莊嚴但欲存身久住無患用止故疥不起新病存命無惡有力快樂飯食已訖受澡手水不高不下不多不少受澡鉢水不高不下不多不少彼洗手淨已其鉢亦淨洗鉢淨已其手亦淨拭手已便拭鉢拭鉢已便拭手彼洗拭鉢已安著一面不近不遠不數觀鉢亦不為鉢彼不毀此食亦不稱譽彼食但暫嘿然已為諸居士說法勸發渴仰成就歡喜無量方便為彼說法勸發渴仰成就歡喜已即從座起便退而還彼名一出家時身不低仰尊沙門瞿曇出家時終不低身彼在街巷不低視亦不仰視唯直正現於中不礙所知所見尊沙門瞿曇諸根常定所以者何以本善行故彼出村時身不低仰

尊沙門瞿曇出村時終不低身彼入園時身不低仰尊沙門瞿曇入園時終不低身彼中食後收舉衣鉢澡洗手足以尼師壇著於房上入房宴坐尊沙門瞿曇饒益世間故入房宴坐尊沙門瞿曇則於晡時從宴坐起面色光澤所以者何以如來無所著等正覺故尊沙門瞿曇口出八種音聲一曰甚深二曰毗摩樓簸三曰入心四曰可愛五曰極滿六曰活瞿七曰分了八曰智也多人所愛多人所樂多人所念令得心定尊沙門瞿曇隨眾說法聲不出眾外唯在於眾為彼說法勸發渴仰成就歡喜無量方便為彼說法勸發渴仰成就歡喜已即從座起歸還本所尊沙門瞿曇其像如是但有殊勝復過於尊我欲詣彼沙門瞿曇從學梵行梵志梵摩告曰隨意



於是優多羅摩納稽首梵志梵摩足繞三匝而去往詣佛所稽首佛足却坐一面向曰世尊願從世尊學道受具足成就比丘得從世尊修行梵行於是世尊度優多羅摩納令學道受具足度優多羅摩納令學道受具足已遊行鞞陀提國與大比丘衆俱展轉進前到彌薩羅住彌薩羅大天柰林彼彌薩羅梵志居士聞沙門瞿曇釋種子捨釋宗族出家學道遊行鞞陀提國與大比丘衆俱展轉來至此彌薩羅住大天柰林沙門瞿曇有大名稱名一周聞十方沙門瞿曇如來無所著等正覺明十行成爲善逝世間解無上士道法御天人師號佛衆祐彼於此世天及魔梵沙門梵志從人至天自知自覺自作證成就遊彼說法初妙中妙竟亦妙有義有文具足清淨顯現梵

行若有見如來無所著等正覺敬重禮拜供養承事者快得善利我等寧可共往見彼沙門瞿曇禮拜供養彼彌薩羅梵志居士各與等類眷屬相隨從彌薩羅出北行至大天柰林欲見世尊禮拜供養往詣佛已或有彌薩羅梵志居士稽首佛足却坐一面向或有與佛共相問訊却坐一面向或有叉手向佛却坐一面向或有遇見佛已嘿然而坐彼彌薩羅梵志居士各各坐已佛爲說法勸發渴仰成就歡喜喜無量方便爲彼說法勸發渴仰成就歡喜已嘿然而住梵志梵摩聞沙門瞿曇釋種子捨釋宗族出家學道遊行鞞陀提國與大比丘衆俱展轉來至此彌薩羅國住大天柰林彼沙門瞿曇有大名稱周聞十方彼沙門瞿曇如來無所著等正覺明行成爲善逝世間名一

解無上士道法御天人師號佛衆祐彼於此  
世天及魔梵沙門梵志從人至天自知自覺  
自作證成就遊彼說法初妙中妙竟亦妙有  
義有文具足清淨顯現梵行若有見如來無  
所著等正覺敬重禮拜供養承事者快得善  
利我寧可往見沙門瞿曇禮拜供養梵志梵  
摩告御者曰汝速嚴駕訖還欲往詣沙門瞿  
曇御者受教即速嚴駕訖還白曰嚴駕已畢  
尊自知時於是梵摩乘極賢妙車從彌薩羅  
出北行至大天柰林欲見世尊禮拜供養爾  
時世尊在無量衆前後圍繞而爲說法梵志  
梵摩遙見世尊在無量衆前後圍繞而爲說  
法見已恐怖於是梵摩即避在道側至樹下  
住告一摩納汝往詣彼沙門瞿曇爲我問訊  
聖體康強安快無病起居輕便氣力如常耶

作如是語瞿曇我師梵摩問訊聖體康強安  
快無病起居輕便氣力如常耶瞿曇我師梵  
摩欲來見沙門瞿曇於是摩納即受教行往  
詣佛所共相問訊却坐一面向白曰瞿曇我師  
梵摩問訊聖體康強安快無病起居輕便氣  
力如常耶瞿曇我師梵摩欲來欲見沙門瞿  
曇世尊告曰摩納令梵志梵摩安隱快樂令  
天及人阿脩羅捷沓和羅刹及餘種種身安  
隱快樂摩納梵志梵摩欲來隨意於是摩納  
聞佛所說善受善持即從座起繞佛三匝而  
去還詣梵志梵摩所白曰尊我已通沙門瞿  
曇彼沙門瞿曇今住待尊唯尊知時梵志梵  
摩即從車下步詣佛所彼衆遙見梵志梵摩  
來即從座起開道避之所以者何以有名德  
及多識故梵志梵摩告彼衆曰諸賢各各復

坐我欲直往見沙門瞿曇於是梵摩往詣佛  
所共相問訊却坐一面爾時梵摩不壞二根  
眼根及耳根梵志梵摩坐已諦觀佛身三十  
二相彼見三十相於二相有疑陰馬藏及廣  
長舌梵志梵摩即時以偈問世尊曰

如我昔曾所聞 三十二大人相

於中求不見二 尊沙門瞿曇身

為有陰馬藏不 一切人尊深密

云何為人最尊 不現視微妙舌

若尊有廣長舌 唯願令我得見

今實有疑惑心 願調御決我疑

世尊作是念此梵志梵摩求我身三十二相  
彼見三十於二有疑陰馬藏及廣長舌我今  
寧可除彼疑惑世尊知已作如其像如意足  
作如其像如意足已梵志梵摩見世尊身陰

馬藏及廣長舌於中廣長舌者舌從口出盡  
覆其面世尊止如意足已為梵志梵摩說此  
頌曰

謂汝昔曾所聞 三十二大人相

彼一切在我身 滿具足最上正

調御斷於我疑 梵志發微妙信

至難得見聞 最上正盡覺 出世為極難

最上正盡覺 梵志我正覺 無上正法王

梵志梵摩聞已而作是念此沙門瞿曇成就

三十二大人之相謂成就大人相者必有二

處真諦不虛若在家者必為轉輪王聰明智

慧有四種軍整御天下如法法王成就七寶

彼七寶者輪寶象寶馬寶珠寶女寶居士寶

主兵臣寶是謂為七千子具足顏貌端正勇

猛無畏能伏他眾彼必統領此一切地乃至

大海不以刀杖以法教令今得安隱若剃除  
 鬚髮著袈裟衣至信捨家無家學道者必得  
 如來無所著等正覺名稱流布周聞十方於  
 是世尊而作是念此梵志梵摩長夜無諛諂  
 無欺誑所欲所問者一切欲知非為觸娆彼  
 亦如是我寧可說彼甚深阿毗曇世尊知已  
 為梵志梵摩即說頌曰

現世樂法故 饒益為後世 梵志汝問事  
 隨本意所思 彼彼諸問事 我為汝斷疑  
 世尊既許問 梵志梵摩故 便問世尊事  
 隨本意所思 云何為梵志 三達有何義  
 以何說無著 何等正盡覺  
 爾時世尊以頌答曰  
 滅惡不善法 立住釋梵行 修習梵志行  
 以此為梵志 明達於過去 見樂及惡道

得盡無明訖 知是立牟尼 善知清淨心  
 盡脫姪怒癡 成就於三明 以此為三達  
 遠離不善法 正住第一義 第一世所敬  
 以此為無著 饒益天及人 與眼滅壞諍  
 普知現視盡 以此為正覺  
 於是梵摩即從座起欲稽首佛足彼時大眾  
 同時俱發高大音聲沙門瞿曇甚奇甚特有  
 大如意足有大威德有大福祐有大威神所  
 以者何此彌薩羅國所有梵志居士者梵志  
 梵摩於彼最第一謂出生故梵志梵摩為父  
 母所舉受生清淨乃至七世父母不絕種族  
 生生無惡彼為沙門瞿曇極下意尊敬作禮  
 供養奉事沙門瞿曇甚奇甚持有大如意足  
 有大威德有大福祐有大威神所以者何此  
 彌薩羅國所有梵志居士者梵志梵摩於彼

最第一謂學書故梵志梵摩博聞總持誦過  
四典經深達因緣正文戲五句說彼為沙門  
瞿曇極下意尊敬作禮供養奉事沙門瞿曇  
甚奇甚持有大如意足有大威德有大福祐  
有大威神所以者何此彌薩羅國所有梵志  
居士者梵志梵摩於彼最第一謂財物故梵  
志梵摩極大富樂資財無量畜牧產業不可  
稱計封戶食邑種種具足豐饒彌薩羅乃至  
水草木謂王摩竭提未生怨鞞陀提子特與  
梵封彼為沙門瞿曇極下意尊敬作禮供養  
奉事沙門瞿曇甚奇甚持有大如意足有大  
威德有大福祐有大威神所以者何此彌薩  
羅國所有梵志居士者梵志梵摩於彼最第  
一謂壽命故梵志梵摩極大長老壽命具足  
年百二十六彼為沙門瞿曇極下意尊敬作

禮供養奉事是時世尊以他心智知彼大眾  
心之所念世尊知己告梵志梵摩止止梵志  
但心喜足可還復坐為汝說法梵志梵摩稽  
首佛足却坐一面世尊為彼說法勸發渴仰  
成就歡喜無量方便為彼說法勸發渴仰成  
就歡喜已如諸佛法先說端正法聞者歡悅  
謂說施說戒說生天法毀些欲為災患生死  
為穢稱嘆無欲為妙道品白淨為說是已佛  
知彼有歡喜心具足心柔軟心堪耐心昇上  
心一向心無疑心無蓋心有能有力堪受正  
法謂如諸佛所說正心世尊具為彼說苦集  
滅道梵志梵摩即於座上見四聖諦苦集滅  
道猶如白素易染為色如是梵摩即於座上  
見四聖諦苦集滅道於是梵摩見法得法覺  
白淨法斷疑度惑更無餘尊不復由他無有

猶豫已住果證於世尊法得無所畏即從座起稽首佛足世尊我今自歸於佛法及比丘衆唯願世尊受我爲優婆塞從今日始終身自歸乃至命盡時梵志梵摩叉手向佛白曰世尊唯願明日垂顧受請及比丘衆世尊爲梵志梵摩故嘿然而受梵志梵摩知世尊嘿然受已稽首佛足繞三匝而去還歸其家即於其夜施設餽饌極妙上法種種豐饒食噉含消施設已訖平旦敷牀至時唱曰世尊飲食已辦唯聖知時於是世尊過夜平旦著衣持鉢比丘翼從世尊在前往詣梵志梵摩家於比丘衆前敷座而坐梵志梵摩知世尊及比丘衆衆坐已定自行澡水以上味餽饌種種豐饒食噉含消自手斟酌令極飽滿食訖收器行澡水竟取一小牀坐受呪願梵志梵

名一

十六

摩坐已世尊爲彼說呪願曰  
呪火第一齋 通音諸音本 王爲人中尊  
海爲江河長 月爲星中明 明照無過日  
上下維諸方 及一切世間 從人乃至天  
唯佛最第一

於是世尊爲梵志梵摩說呪願已從座起去彌薩羅國住經數日攝衣持鉢則便遊行至舍衛國展轉進前到舍衛國住勝林給孤獨園於是衆多比丘舍衛乞食時聞彼彌薩羅梵志梵摩以偈問佛事彼便命終諸比丘聞已食訖中後收舉衣鉢澡洗手足以尼師壇著於肩上往詣佛所稽首作禮却住一面白曰世尊我等衆多比丘平旦著衣持鉢入舍衛乞食時聞彼彌薩羅梵志梵摩以偈問佛事彼便命終世尊彼至何處爲生何許後世

名一

十七

